

那文毅公奏議

那文毅公三任陝甘總督奏議卷五十九目錄

卷五十九

朔方水利

請禁新疆私茶

酌改邊防佐貳官制

整飭武備

調劑營伍

斷定蒙古地界

那文毅公三任陝甘總督奏議卷五十九

男
容安恭輯

朔方水利

道光四年二月十五日

奏爲寧夏渠工年久淤墊循例懇請借項興修以利
農田事竊查甘省寧夏府屬寧夏朔平羅三縣
向設

大清及唐來漢延惠農昌潤五渠導引黃河之水分灌
民田每歲春間挑濬一次原係民捐民修官爲督
辦如遇工大費多民力不逮歷經

奏准借銀興修分年攤徵還項自嘉慶十九年借修
之後道光二年惠農渠之將軍得勝曾家等埝被
水衝塌亦經

奏明借銀修築堅固其他各渠並未修理近因渠底
日久淤高渠流不暢且以黃河今昔變遷進水紆
折遂致灌溉不能周到民田收成因之歉薄

臣上

年因公過寧訪悉情形並據各渠士庶紛紛呈請
借項興修當將籌辦不善之道廳知縣分別叅辦
具奏在案彼時因值夏令農忙不能勘辦當卽另
委道府等先行相機設法引水普灌且濟一時之

急嗣經

奏明飭委蘭州道楊翼武前往通歷確勘估辦茲據該道會同新任寧夏道瑞慶具詳除

大清唐來二渠工段無多民可自辦外惟漢延惠農昌潤三渠應行挑挖渠身添建閘座改砌石馬頭迎水埧順水堤堰加築禦水長堤改開新渠俾各因勢利導水得暢流計撙節估需工料及改開新渠所需地價共銀二萬九千九百一十七兩零內昌潤渠地方有滂沱貼滂二支渠所修工段計銀一千三百九十四兩零因該處民情較苦應給工價

請卽就近於平羅縣倉貯額徵小麥內照部價每銀一兩改給倉麥一石使窮黎藉沾餘潤其餘仍均以銀給發其改開新渠佔用民地無多應納錢糧另請豁免等情並據藩司覈明具詳前來臣復查宣夏等三縣民田全賴各渠之水以時引灌今旣據該道等勘明應挑應改之處一時民力難以舉辦事關民瘼不敢膜視合無仰懇

天恩俯循往例將所需工料銀二萬九千九百一十七兩零准其於司庫籌款借給興修仍於受水戶民名下按畝攤徵還款內漢延渠借銀三千七百八

十兩請自本年秋後起分作二年徵還惠農渠借銀五千四百四十五兩零該渠尙有應還二年借修將軍等埝銀兩年限未滿請自五年秋後起分三年徵還昌潤渠請借連倉麥抵發共銀二萬六百九十一兩零該渠借項既多田地又少兼以連年歉收戶民貧乏請自本年秋後起分六年徵還以紓民力已飭具領銀兩趕緊購料鳩工責成蘭州道楊翼武會同盛夏道瑞慶督率印委各員分段照估實力修辦務期一律堅固深通勒限立夏前完工具報俾農民咸沐

恩慈示資利賴謹

奏

道光四年三月初六日奉

上諭那彥成奏寧夏渠工請借項興修一摺甘肅寧夏等三縣民田全賴各渠之水以時引灌近因渠底日久淤墊該督委員會同該管道周歷履勘分別應挑應改之處工大費多民力實難舉辦所有估需工料銀二萬九千九百一十七兩零著准其於司庫籌款借給興修仍於受水戶民名下按畝攤徵還須內漢延渠借銀三千七百八十兩著自本年秋後起分作

二年徵還惠農渠借銀五千四百四十五兩零該渠
尙有應還二年借修將軍等埝銀兩年限未滿著自
本年秋後起分三年徵還昌潤渠請借運倉抵發共
銀二萬六百九十一兩零該渠借項旣多田地又少
兼以連年歉收戶民貧乏著自本年秋收後起分六
年徵還以紓民力該督卽飭該管道具領銀兩趕緊
購料鳩工督率印委各員分段照估實力修築勒限
立夏以前完工具報務期一律堅固深通俾農民永
資利賴

道光四年六月初六日

奏爲借項修濬寧夏渠工一律完竣恭摺奏

聞事竊照寧夏府屬漢延惠農昌潤三渠年久淤墊水

不暢流該處民田難資灌溉節經臣委員勘明應

挑應改之處飭估工料先行借項興修仍於受水

戶民名下分限按畝攤徵還欸奏蒙

俞允在案臣當卽飭令專派督修之蘭州道楊翼武會

同寧夏道瑞慶督率該管府縣及水利同知張東

序分派委員集夫購料於三月初一日興工該道

與委員等均能不辭勞瘁實力遺修業於四月初

一日一律如式竣工引水入渠極爲通暢前次渠

銷民田所不能周到者現亦普資灌足凡屬農民
無不感沐

皇恩同聲歡頌所有用過工料銀兩飭造報銷細冊另
行

題銷至水利同知張東序因上年引放渠水經理不
善當經奏請摘去頂戴責令在工設法妥辦如果
無悞再請開復在案嗣該員日夜駐工往來相度
凡可以引水灌及者無不隨時盡心籌辦迨後隨
同委員勘估各工及現在趨修竣事尤能認真出
力尙知愧奮合無仰懇

皇上格外

天恩准將該員摘去頂戴之案

俯予開復再蘭州道楊翼武自派委以來各渠共計通
長五六百里該道晝夜奔馳督查任勞任怨經手
錢糧尤能節省實用在工該道係監司大員毋庸
請敘惟其實心出力之處不敢壅於

上聞則該員以後益加奮勉其餘各員由臣存記遇事
再行斟酌鼓勵謹

奏

道光四年六月二十三日奉

上諭那彥成奏修濬渠工完竣一摺甘肅寧夏府屬漢
延惠農昌潤二渠年久淤墊前經該督奏請借項興
修當卽降旨允行茲據奏稱現已一律如式竣工引
水入渠極爲通暢民田普資灌足所有水利同知張
東序前因經理不善摘去頂戴今在工出力尙知愧
奮著加恩准予開復蘭州道楊翼武督辦認真著交
部議敘以示鼓勵

請禁新疆私茶

道光二年十二月二十七日

奏爲新疆各城行銷茶封應請定立章程禁止私販
充斥並請分年帶銷滯引以裕

國課事

臣

查甘肅茶引原額二萬七千二百九十

六道分西寧莊浪甘州三司行銷乾隆五十二年
及嘉慶四年十一年因甘司行茶地方直達新疆
地面旣寬銷茶較易節經各前任督

臣

奏明增引一千七百道共引二萬八千九百九十六
道每年徵收九成折色銀十二萬二百九十三兩

零一毫官茶二萬八千九百九十六封所徵茶官
茶間年撥運伊犁塔爾巴哈台烏什三處給官兵
在俸餉內扣價歸款其烏魯木齊等處所需茶封
均係甘司官商將茶運至涼州肅州交給散商販
運出口自行銷售是新疆爲甘司行引之區久已
定有地界難容私販充斥以致官引滯銷虧短

國課前因官茶未能照引暢銷經陞任督臣長齡飭

令嚴拏私茶隨據迪化州查獲東明芳號之張凌
一等販賣茶封由歸化城張家口草地運往烏魯
木齊銷售請有綏遠城將軍照票並在歸化城輸

納稅銀當經咨准綏遠城將軍覆稱張凌一等置
買襪貨布疋茶封運往烏魯木齊等處售賣歷任
將軍俱不知新疆一帶另有商人請引行茶是以
填給照票等情經陞任督臣長齡以張凌一等所
販茶封請有照票並納稅銀由來已久委係不知
例禁自未便遽照私販治罪但新疆地方本係甘
肅行茶之處未便任其以無引之茶販往充斥議
令貸其既往禁其將來咨准部覆照議辦理並准
部咨以甘肅行茶地面較廣私茶既禁原額引張
自行不敷行銷行令會同新疆等處將軍大臣查

明每處每年應需茶若干核明確數共應增添引
張若干抑係在於折色茶封內撥運之處妥議章
程奏明辦理當經移准烏魯木齊都統覆稱烏魯
木齊等處距甘司較遠難以搭放官茶請仍令北
路商民販賣茶封於古城設局委員收稅以抵甘
司課項又准定邊將軍咨稱烏里雅蘇台科布多
距甘司過遠勢難搭放官茶並以乾隆二十五年
曾奉

諭旨令販賣雜貨布疋茶封之商民等前赴烏魯木齊等
處貿易請將烏里雅蘇台科布多二處北路商民

銷剩餘茶准赴烏魯木齊等處易換糧食先後咨
覆_臣行據藩司蘭州道會同核議茲據詳稱甘省
行銷茶引定例伊犁塔爾巴哈台烏什三處間年
撥運官茶五萬數千封沿途官車不敷運送共需
津貼腳價銀二萬有奇在食官茶兵名下攤扣還
欸若再爲烏魯木齊等處運送官茶官車更不敷
用津貼腳價愈重官兵扣項愈多邊隅寒卒亦難
一持自應如該都統將軍所議均毋庸搭放官茶
以恤兵艱至烏魯木齊所請仍令北路商民販賣
茶封於古城設局委員收稅抵課之處毋論派往

人員難保無侵蝕情弊而茶無官引憑何稽察更
恐商人串同分肥轉以新疆行銷私茶藉詞虧短
甘司課項尤於茶政有礙卽定邊將軍所議烏里
雅蘇台科布多二處北路商民銷剩餘茶准赴烏
魯木齊易換糧食亦難保無影射私銷充斥甘司
正引均未便照議辦理詳請仍將烏魯木齊等處
地面歸於甘司行銷茶封並請將滯引銷完之後
酌定增添引額等情具詳前來臣查甘司行銷茶
引本有一定地面因北路商民請票販賣襍貨布
疋夾帶茶封漸致充斥官引自應嚴行禁止查烏

里雅蘇台科布多二處向設北路商茶應仍聽該
商照舊販賣惟止准就地行銷不許私赴烏魯木
齊等處易換糧食致滋影射充斥其伊犁塔爾巴
哈台烏什三處仍舊搭放官茶毋庸更易外所有
烏魯木齊巴里坤古城吐魯番庫爾喀喇烏蘇喀
什噶爾英吉沙爾阿克蘇葉爾羌和闐喀喇沙爾
庫車十二處本係甘司行引地面應仍歸甘司銷
茶納課如有此路商民販賣無引茶觔卽照私販
治罪如此定立章程則私茶不能充斥官引可期
暢銷應卽酌增引數以裕

國課第查道光二年西莊甘三司滯銷之引尙有二萬八千九百餘道若於此時卽請增引恐未能同時並銷而烏魯木齊十二處每年實在可以增引若干亦難預定應請責令茶商怡和眞等於道光三年運銷額引之外將西莊甘三司道光二年以前滯引在於甘三司分作三年帶銷全完再行察看情形烏魯木齊等處每年實在可銷茶若干應增引若干酌中定數

奏請加增以昭核實謹

奏奉

硃批該部核議具奏

道光四年六月初十日

奏爲籌議新疆運行茶引招商非宜請仍責成甘司
商人領辦並請酌減烏里雅蘇台運茶箱數以安
邊圉而便民食事竊伊犁將軍臣慶祥前以新疆
各城回夷素食襍茶甘肅官商所運附茶非其所
欲有格礙難行之處請在新疆地面行銷襍茶奏
蒙

俞允並以酌添引張一節

勅部議覆應照陝西甘肅之例卽添在新疆地方令商

人承領照茶輸課每年應添引若干徵課若干難以懸定令_臣等會同查議並將甘司茶引有無壅滯應行裁撤亦一併查明具奏總期安邊便民通商裕課四者毋失其一奏奉

諭旨准行欽遵行知前來_臣正在核辦又接准戶部咨奉

上諭果勒豐阿等奏烏里雅蘇台地方請准商民仍循舊規馱載磚茶前赴古城兌換米麵一摺著照所請准其令商民等每年馱運磚茶七千餘箱前赴古城兌換米麵仍照例給發印票祇准該商等前至古城

不准另往他處售賣並著烏魯木齊都統就近詳察西路各處情形核辦務期銷售茶封兩無滯礙欽此行令歸入前案一併妥議具奏伏查新疆地方夷民襍處茶觔一項爲日食所必需向係甘肅內地商人運往銷售從未聞有缺茶之處於商於民原屬相安無異近年以來北路無引茶觔名爲運至古城易換糧食實則四路販賣壅滯官茶是以臣曾於上年奏准嚴禁私販疏銷滯引在案夷民之於茶觔旣一日不可缺商人之於引地又

國課所攸關自應籌全兩益事垂遠久方爲盡善部

臣所謂安邊便民通商裕課四者毋失其一之論誠屬至當不移茲果勒豐阿等仍欲以無引之茶奏令該處民人馱載七千餘箱前赴古城兌換米麵殊不知該處口糧食物等項嘉慶四年奏准由科布多撥運屯糧並撥出官馱每年赴內地置買食物一二次分給上年戶部議覆新疆運茶案內指明有據是應需口糧本有所藉卽或不敷亦未必全須茶販帶運古城爲新疆彈丸一域向未住有商民今請馱運茶觔七千餘箱雖未據聲明每箱觔重數目當亦有官茶七千餘引之數古城一

處豈能盡銷其爲借名影射欲侵越於新疆各城
顯而易見况官茶每引納正課銀三兩襍項銀一
兩四錢零而該處運茶並無引課止於殺虎口歸
化城二處每箱各納稅銀一錢課稅旣相懸遠其
利自可倍蓰此等販茶之人旣非官商亦無定數
又無專員憑引稽查無籍之徒爭趨若鶩勢必愈
久愈多新疆重地豈可使若輩以無引無課之茶
到處充斥且人數旣多奸良莫辨深恐日久與回
夷等往來交結必生枝節甚至夾帶違禁諸物更
難保其必無似非所以安邊境而便夷民也卽以

准其請票納稅辦理而論究竟每年應運若干茶
每票應定若干數每票用幾次有無年月限期且
票係何人承領有無總領散領之人係何姓名有
無冊檔可查自本處販運至口外銷處以及途間
如何稽核均未議及亦非經久之計至慶祥前請
於新疆添引之議原屬籌酌變通惟是改添引目
應招土著殷商領運新疆各城除回夷之外均屬
客民素無土著既無土著何有殷實向來各舖戶
多係由歸化城轉賣運售卽屬無引之茶其成本
之不能充裕可想而知此時縱使招充亦不過行

蹤無定之人有利則來無利則去紛紛更易滋擾
必多况舊制以茶易馬原寓控制外藩深意方今
中外一家誠無區別然以口外應食之茶卽於口
外招商辦運揆之馭邊之道亦覺非宜而以後官
商稽運悞課在所必然尤非所以裕

國課而通商賈也臣體訪情形再三籌酌應請將果
勒豐阿等請販茶觔七千箱之數仰懇

聖恩准其每年改運襍茶三千箱前赴古城易換米麵
若運他處售賣及私行多帶者卽照私茶律治罪
則爲數酌減售私自少於蒙古一帶口食仍無所

損而新疆各城官茶引地庶不致多被侵佔至所
運茶箱每箱應以若干觔爲定或改領引目納課
或仍前給票完稅其辦茶之地以及經由各處應
如何分別稽查應用商人若干名如何開報花名
註冊咨部備核以杜隱橫之處仍請

勅部詳細議定飭遵此外新疆各處旣無可招之商應
請仍令甘司商人每年令增新疆襍茶引目三千
道照邊引之例配茶納課於烏魯木齊古城地方
設立茶局二處將茶陸續運往屯聚分運各城源
源接濟仍試行三年或增或減再行核實定數或

是商人販運茶觔成本所係而夷民買食又利價輕尤宜籌得其平方爲兩便查從前各司所行茶觔每引額定一百一十四觔嗣於乾隆二十七年
前督臣楊應琚以引茶壅積裁減七十五觔爲一引現尙照此運行今所增襍茶三千引並請改照舊額每引配茶一百一十四觔庶茶引增觔商本輕減其賣價即可較賤於夷民自更相安仍將賣價先行明白曉示不准高擡居奇所販之茶或不能如式卽治以應得之罪此外新疆應行附茶之處仍聽甘商照常運銷如此則以歷久辦運無悞

之商行回夷需食之茶而又去其私販流弊似於
安邊便民通商裕課較爲有益臣 纔悉情形數月
以來諮訪亦屬相符因卽札致伊犁將軍臣 慶祥
會商具

奏今慶祥來札以新疆無殷實土著之戶可令充商
仍欲令北路商民徑運裸茶聽其由古城運往南
北各路販賣並於北路古城地方設立稅局由臣
派員前往抽收稅課伏查前據果勒豐阿具奏仰
蒙

聖明洞鑒行茶引地未便侵越止准北路商民運茶至

古城兌換米麵不准另往他處

天語煌煌至公至允茲若不論南北不計茶數任其販
赴各城銷售是於新疆各路萬餘里之內以無引
無課之茶縱令無賴之徒肆行牟利其中流弊何
可勝言此而謂之安邊便民實非臣所敢置詞至
各商辦茶完課自應赴專管衙門計茶輪課若以
無引之茶稅而欲於數千里外專設稅局由臣派
員往就抽收不特諸多未便且議近言利亦覺不
成事體臣仰荷

天恩畀以邊疆重任辦理諸事惟知虛衷推求不敢稍

有固執今與慶祥意見既有不同又不敢附和遷就謹就臣管窺所及據實具奏謹

奏奉

硃批該部議奏

容安謹案以上二奏經戶部核議奏稱未經親
歷難以懸斷仍請交伊犁將軍等妥議具奏嗣
據伊犁將軍查明奏奉

諭旨仍循舊章辦理其古城稅課一節責成鎮迪道就
近抽收之處仍著伊犁將軍議奏 先公於次
年調任直督未及會議

酌改邊防佐貳官制

道光二年十一月十二日

奏爲邊缺主簿今昔情形不同請

旨酌量改爲繁缺以重邊疆而資治理事竊查西寧一郡地形遼濶與青海蒙古番子界址毗連所屬閭門外丹噶爾地方距府城九十里係漢土回民並遠近番子蒙古往來交易之所前設主簿一員專司稽察原因當時外夷安帖貿販無多治理較易故定爲簡缺於初任候補人員內循例挨補迨後爲日旣久商賈雲集其中良莠不一該處距日月

山卡僅數十里路徑叢襍奸宄潛蹤近年來野番
佔踞河北每有漢奸私販出口接濟野番糧茶軍
火勾引搶劫且該處道通海藏並有應徵番糧進
藏差務絡繹不絕地廣事繁最關重要該主簿駐
劄該處有彈壓蒙番稽查奸慝之責必得明察熟
練之才庶足以資治理斷非初任揆補人員所克
稱職臣自辦番案以來目擊情形復與署藩司徐
承恩署臬司張本枝詳細籌酌似應將丹噶爾主
簿改爲繁缺庶得隨時遴選幹員陞調以期人地
相宜至繁缺主簿內應改一簡缺以符定制查有

皋蘭縣河橋主簿向係繁缺駐劄省城專管黃河
浮橋船隻別無重務尙屬易於經理應卽以河橋
主簿改爲簡缺仍於試用人員內挨次輪補則邊
疆重地查緝可期得力而河橋一事專員辦理亦
仍不致廢弛現據藩臬兩司會詳請

奏前來合無仰懇

皇上天恩以丹噶爾主簿改爲繁缺河橋主簿改爲簡
缺如此一轉移間旣於銓政無礙而彼此繁簡合
宜於邊防實有裨益謹

奏奉

硃批該部議奏

容安謹案此奏經部議准奉

旨允行

道光三年四月二十五日

奏爲邊番同知所屬添設襍職以資佐理事竊照西
寧府屬貴德循化二處向各設同知一員並未設
有佐襍該二廳地方遼濶蒙番襍處政務本屬殷
繁現在野番均回河南防查漢奸嚴稽保甲一切
尤關緊要一人經理恐有顧此失彼之虞該同知
若遇出城查辦事件城內僅一教職所有倉庫城

池監獄卽無代行管理之員地處邊疆難昭慎重
必須添設佐裸協同稽查彈壓方爲周備臣前此
未曾辦到今回省與藩司朱桂楨署臬司劉斯崐
公同酌議均稱應請於循化廳添設主簿一員貴
德廳添設照磨一員專司緝捕兼管監獄均定爲
要缺三年邊俸屆滿在外揀員更替如果始終奮
勉以應陞之缺卽陞惟遽請另行添設俸餉一切
諸多繁費查有省城按察司繁缺照磨僅止盤驗
蘭州道所管茶封再無專司之事又臯蘭縣河橋
簡缺主簿專管黃河拆建浮橋並橋頭抽收木植

木稅事務本簡應請將此二缺改於循化貴德其
照磨所遺點驗茶封事宜歸併按察司司獄辦理
主簿所遺河橋等事併與同城之蘭州府經歷管
理均可兼顧無悞如此裁改既不虛糜經費而於
邊防重地實屬有裨再改設官員例應對缺裁改
今擬裁汰之河橋主簿係屬簡缺有礙銓政查有
平羅縣屬石嘴繁缺主簿原因吉蘭泰鹽池歸於
內地辦理而設今鹽務久經停止不准行銷該主
簿止於稽查河岸並不繁劇應改爲簡缺歸部月
選一轉移間卽與定例相符臣因地方緊要起見

是否有當理合恭摺奏

聞如蒙

聖恩俞允其應裁之按照磨係正九品新設之廳照磨
係屬從九品階級不一廉俸役食均不相同應俟
命下之日同建修衙署各事宜再行分晰照例咨部議
辦謹

奏奉

硃批吏部議奏

容安謹案此奏經吏部議准得

旨依議

道光三年正月十八日

奏爲理番同知擬請改隸近番府屬並將近番府缺改由本省題調以重邊防事竊查甘肅循化貴德兩廳均係理番同知向歸青海大臣管轄該兩同知分管黃河迤南番族凡有蒙番事件貴德同知卽由該管之西寧府就近核轉青海大臣衙門辦理甚爲便捷惟循化同知遠隸蘭州府屬青海大臣檄辦事件須由蘭州府轉行西寧距蘭州六百餘里蘭州距循化又五百餘里文報往返已屬需時而蘭州府又不歸青海大臣統轄遇事尤多掣

肘現在河北番族全數驅過河南旣已設立千戶
百戶百總千總層層鈐制則以後之稽察約束更
關緊要該兩同知地界毗連必須會同辦理而分
隸兩府勢難期於畫一應請將循化同知改隸西
寧府屬一切公事均由該府就近核轉青海衙門
辦理以免歧異該廳距西寧郡城僅止二百餘里
文移往返亦可無虞延緩實於邊務番情悉臻安
速至西寧府係衝繁疲難四字相兼要缺例應請
旨簡放前督臣長齡恐初到人員不諳邊地番情奏請
改爲在外題補欽奉

上諭請旨之缺改爲在外題補未免事涉更張如謂地方緊要恐新到人員措施未當嗣後簡放之員該督撫果察看人地未宜或揀員對調或甄別改補均可隨時秉公辦理總期治理得人非必改由本省陞擢始堪勝任也所有西寧府改爲在外題補之處著不准行欽此自應欽遵辦理

臣

何敢再行瀆請惟查該

府管轄西寧大通碾伯三縣貴德巴燕戎格二廳俱係蒙古番回襍居錯處治理已屬不易兼之青海衙門一切蒙番交涉事件均須該府審辦現在又將循化廳一缺請歸該府管轄政務更屬殷繁

新到人員即使認真學習亦非一時所能熟諳若
奏調別府則蒙番情形與腹地迥殊仍與新任人
員無異亦屬不能得力臣再四熟籌似必須於曾
任該府屬丞倅縣令人員內擇其才守兼優而又
熟悉蒙番情形者方爲有益臣受

恩深重不敢瀆請改缺爲屬員陞擢之地亦斷不敢罔
顧邊防稍存避忌之心謹再將邊疆要缺必資熟
手治理實在情形奏懇

皇上天恩俯准將西寧府知府一缺改由本省揀員題
調俾要缺經理得人邊防免滋遺悞如蒙

俞允西寧府係請

旨簡放之缺不歸部選亦於銓政無礙謹

奏奉

硃批吏部議奏

容安謹案此奏經吏部議駁得

旨依議

整飭武備

道光三年十二月初二日

奏爲派委各鎮總兵巡哨事竣邊界安靜事竊照嘉慶十五年欽奉

上諭嗣後川楚陝三省每年輪派提鎮於邊界遍歷周查每巡哨一次卽行具奏欽此歷經遵行在案本年秋間

經前督臣長齡移咨四川湖廣兩省總督派委提

鎮分途會哨一面飭委陝安漢中河州三鎮各赴邊界認真巡察務使奸宄無所隱藏茲據漢中鎮總兵劉瑞稟報十月初一日在於川陝交界之漁

渡壩與四川重慶鎮總兵余步雲巡哨一面又據
陝安鎮總兵張起鰲稟報十月初十日在於陝楚
交界之蓮花寺與護理湖北鄖陽鎮總兵鄭國鴻
巡哨見面又據河州鎮總兵多隆武稟報十月二
十日在於川甘交界之哈南寨馬尾墩與四川松
潘鎮總兵唐文淑巡哨見面十一月初一日在於
陝甘交界之白馬關與漢中鎮總兵劉瑞巡哨見
而並據該鎮等稟稱查得沿邊各路匪徒歛跡商
旅安業民情均極恬熙臣覆查川楚陝邊界林深
路襍最易藏奸而南山一帶五方襍處尤爲緊要

當卽諄飭各鎮不可以地方安靜稍存疎懈必須
時時留心稽察以期永臻靜謐仰副

聖主綏靖邊氓安益求安之至意謹

奏奉

硃批知道了

道光三年五月初十日

奏爲遵

旨查閱甘肅營伍恭摺具奏事竊

臣

接准部咨欽奉

上諭本年應行查閱營伍之期甘肅著卽派那彥成查

閱欽此當經

臣

奏明先赴寧夏校閱並將由省起程

日期附片奏

聞在案

臣

於本月初六日行抵寧夏卽日前赴滿營將

官兵逐加較閱排演陣式均屬整齊進步連環及
五子過堂鳥鎗亦俱聯絡弓力六力八力不等鳥
鎗及步箭準頭均好每兵十名鎗箭中靶合計均
在二十五箭十五鎗以上其餘技藝亦俱嫻熟堪
列二等各兵年力均屬精壯各旗協領佐領等官
弓馬俱尙可觀臣擇其優劣當場分別勸懲惟兵
丁步箭架式不免沾染綠營習氣應須演改而馬
箭亦因駐防滿營平日馬上差使較少雖能射箭

馬上尙須習練臣面告將軍格布舍副都統卓爾
琿保隨時嚴督官兵勤加訓練令馬步箭俱教演
滿洲樣式務使咸臻純熟旋於初九十等日較閱
鎮標暨調集所屬各營官兵排演陣式試打連環
過堂烏鎗亦俱聯絡齊整鎗箭中靶亦數分數弓
力足有八力十力十二力不等馬上技藝並對刀
藤牌亦甚趨健堪列二等兵丁俱各強壯間有弓
馬軟弱技藝生疎者臣當卽責革示懲擇其年壯
技優者記名拔補以示鼓勵惟有古水并守備菩
關保安定堡守備王殿魁靈州營守備史克雲先

經該總兵史善載以該備弁等弓馬生疎呈請核辦_臣當場考驗菩關保王殿魁史克雲等弓馬實屬平常未便稍事姑容均應請

旨革職以肅戎行至滿漢兩營旗幟器械均一律鮮明堅利馬匹臚壯足額鎮標公項銀兩盤查無虧營制均屬整齊其鎮屬中衛一協_臣先於路過該營時校閱與鎮標大畧相同_臣諄囑總兵將備仍須勤加操演技藝精純仰副

聖主整飭營伍慎重邊防之至意_臣卽於次日拜摺起程出口前赴沙金托海勘斷杭錦與阿拉善旗互

爭地界之案勘辦事畢卽順道固原查閱提標官兵再行具

奏謹

奏

道光三年五月二十七日奉

上諭那彥成奏查營伍一摺甘省古水井守備善關保安定堡守備王殿魁靈州營守備史克雲弓馬平常俱著卽革職該部知道

道光三年六月十三日

奏爲查閱固原提標及所屬營伍情形恭摺奏

聞事竊

臣

閱過宣夏滿漢官兵曾經恭摺具奏在案茲

於六月初六日行抵固原當將提標中左右前後
城守六營及所屬協路各營汛官兵逐加較閱排
演陣式甚屬整齊進步連環及五子過堂鳥鎗亦
俱聯絡鎗箭准頭架式俱好每兵十名鎗箭中靶
合計俱在三十箭二十鎗以上弓力亦俱在六力
以上尤多八力十力者其餘馬上及步下藤牌襍
技等項均極趨捷純熟覆閱提臣楊遇春奏教演
之速戰陣隊嚴肅整齊所用連環擡礮噴筒刀矛
等械亦極精熟實可爲通省營伍之冠堪以列爲

一等各兵年力均屬強壯各營旗幟器械鮮明堅利馬匹俱屬臙壯臣於閱畢後卽擇其技藝尤爲出衆者優加獎賞臣伏思陝甘兩省官兵屢經出師俱甚爲得力惟平時若不勤加操演亦恐漸就廢弛現在督標之兵臣按日親身操練其年老軟弱者隨時挑換兵丁俱屬精壯鎗箭長矛漸臻嫻熟現與提臣楊遇春面爲講論將督提兩標訓練章程通飭各營倣照演習仍留心稽查不時按名調驗倘有怠惰卽行嚴叅期於一律精純咸成勁旅仰副

皇上整飭營伍之至意再烏魯木齊巴里坤提鎮各標並所屬營汛遠在口外歷屆查閱之年俱

奏明由烏魯木齊都統就近校閱臣現已查照往例

咨明烏魯木齊都統英惠循照辦理臣於拜摺後

卽馳回省城謹

奏奉

硃批知道了

道光三年九月十四日

奏爲查閱河州鎮標及所屬營伍情形恭摺奏

聞事編臣於八月十七日自省起程前赴河州查閱該

鎮屬營伍當將起程日期

奏明在案茲

臣

於本月十九日行抵河州卽將該鎮

左右二營並城守及所屬階秦洮岷臨鞏等營將
備官兵通行核閱各該營旗幟甲械俱皆鮮明利
銳馬匹亦臚壯足額試演九進連環聲勢連絡陣
式嚴整起止齊截進退利便過堂排鎗亦屬趨捷
及馬上技藝簫牌對刀各技俱尙合式其弓箭鳥
鎗統計每兵十名中靶俱在三十箭二十鎗以上
弓力亦在六力以上其間有用八力及十二力者
亦屬不少兵丁亦俱精健堪列二等

臣

擇其才技

出衆者當場優加獎賞間有技藝生疎者當卽分別責懲又馬鎗不如固原提屬弓箭長矛不及督標已嚴諭各該管將備認真督飭勤加訓練以期盡臻純熟共成勁旅以仰副我

聖主整飭戎行之至意

臣

閱畢後隨於二十三日

起程前往循化貴德一帶查勘撒拉爾並稽查回巢野番及蒙古戶口河南北安設各路兵丁至西寧鎮標官兵前往派撥各卡防守惟甫經換撤回營一切軍裝器械一時尙未齊備

臣

擬俟明年再行查閱於營伍旣屬有裨且今該蒙番咸知本省大員

不時親臨巡查知有儆畏於撫綏邊圉亦覺合宜
謹

奏奉

硃批知道了

道光三年十月十二日

奏爲查閱甘州肅州兩提鎮營伍情形恭摺奏

聞事竊

臣

前將閱過河州鎮屬營伍並起程由循化貴

德一帶查勘蒙番情形順赴甘州等處校閱營伍

緣由專摺

奏明在案茲

臣

於九月二十八等日先後行抵甘

州肅州將提鎮各標並所屬各協營將備官兵通行校閱各該處旗幟甲械俱皆鮮明利銳馬匹亦臙壯足額試演九進連環聲勢聯絡陣式整齊進退便利過堂排鎗及馬上技藝藤牌對刀各技俱尙合式其鳥鎗弓箭各營官兵施放準頭中靶均在三十箭二十鎗以上弓力亦在六力以上惟其中靶等第微有不同臣細加校核甘州提屬堪列一等肅州鎮屬堪列二等當卽擇其材技出力者各加獎賞技藝生疎者分別責懲並嚴諭各營將備認真訓練以期盡臻純熟咸成勁旅仰副

聖主整飭戎行之至意臣閱畢後隨於九月二十一日
自肅州起程前赴涼州查勘滿漢官兵容俟校閱
後另行奏

聞謹

奏奉

硃批知道了

道光三年十月十二日

奏爲查閱涼莊滿漢營伍恭摺奏

聞事竊臣前將閱過甘州肅州二提鎮營伍情形恭摺
具

奏在案旋由甘州起程於九月二十八日行抵涼州
前該處並莊浪滿漢各營及城守營並協路官兵
次第較閱各該營排演大陣馬步整齊進步連還
及五子過堂甚屬聯絡每兵十名鎗箭中靶在三
十箭二十鎗以上弓力自六力至十二力不等試
演馬上步下各項技藝均皆可觀器械旗幟鮮明
堅利馬匹俱臙壯足額臣悉心校核涼莊各滿營
馬步箭較之寧夏滿營爲優其涼州鎮標官兵馬
步箭頗有可觀惟長矛鳥鎗仍欠純熟涼莊滿營
可列爲一等涼州鎮可列爲二等臣擇其材技出

衆者優加獎賞稍覺平庸者當予責懲查陝甘綠
營官兵向來本稱勇健臣現與各將軍都統提督
總兵俱係受

恩深重之人互相砥礪專心訓練務期所管兵丁悉成
勁旅臣仍嚴諭該管營員各項軍器技藝隨時講
明勤加操演精益求精以副

聖主整肅營伍慎重邊陲之至意臣閱畢卽行起程於
十月初六日回至省城沿途查看民情歡洽秋收
七分有餘堪以仰慰

聖懷謹

奏奉

硃批知道了

道光三年十二月初八日

奏爲查閱陝甘督標五營並蘭州城守營伍情形恭摺奏

聞事竊查陝甘兩省營伍本年輪值巡閱之期

臣欽奉

諭旨派閱甘肅各營並經奏代撫

臣

盧坤查閱陝西提

標及河州鎮標官兵嗣於夏秋兩季先後將寧夏

固原河州甘州肅州涼州各提鎮屬營伍並各滿

營官兵認真校閱分別等第陸續具

奏聲明西寧一鎮展至明歲再爲查閱在案茲臣於十一月二十五日將督標五營並蘭州城守營官兵逐加校閱照年例排演陣式進步連環及五子過堂鳥鎗箭準頭每兵十名合計在三十五箭二十五鎗以上弓力在六力以上用八力十力十二力者尤多各營馬匹臚壯足額其副叅遊守各員馬步箭均皆嫻熟伏查

國家設兵衛民操練最宜加勤况總督統轄提鎮總督勤於操演各提鎮自不敢怠惰觀摩所係尤爲緊要臣上年到任卽於督標各營內挑選十分精

壯兵丁一千四百名作爲速戰隊弓箭鳥鎗長矛
擡礮均勻配齊合成一隊每月逢一四七日輪流
傳集親在箭道內操練每逢九日臣亦騎馬帶領
在城外合大隊教演其餘之日令中軍副將在箭
道督操一年以來箭手弓力俱在十力以上靶子
寬僅八寸每名中四五箭者居多鎗手在八十弓
外打灰毬試准十名之中中三鎗者六七其長矛
擡礮兵丁進退捷速試用合式各兵內稍有不精
熟者臣卽時重責技藝優嫻者臣月月捐廉厚賞
並拔缺鼓勵設有緩急調一兵卽得一兵之力必

使平日不致糜餉臨時自可建功臣仍勤謹親操
務期精益求精斷不敢因兵力稍強少自放逸謹
奏奉

硃批知道了

容安謹案擡礮擡鎗長矛營制中向所未設
先公所歷各任皆創行之便捷異常道光六年
回疆用兵深資擡礮之力至今則各省多請設
立莫不由甘揀調人員教習

道光四年十月十五日

奏爲校閱西寧鎮標營伍情形事臣於九月二十

二日自省起程行抵西寧卽行鎮標五營並城守營及所屬各弁兵等通行較閱各該營排演大隊馬步整齊進步連環五子過堂鳥鎗俱爲聯絡藤牌及馬上技藝亦皆嫻熟可觀至該鎮兵丁臣去歲在寧卽經飭令將老弱者全行更換現在各兵均皆年力精壯弓力自八力至十二力不等每兵十名鎗箭中靶俱在三十箭二十鎗以上演習長矛亦有成效馬匹器械均屬騰壯堅利堪以列爲二等其間弁兵技藝出衆者當場優加獎賞弓馬平常者分別降責至於入營未久兵丁其技藝雖

有未能十分純熟者第皆年壯力强均堪造就現已諄飭該鎮榮玉材勤加訓練務使悉成勁旅以仰副

皇上整飭戎行之至意再有該鎮標後營都司馬聖佐中營守備邵剛二員並把總四員前經該鎮面稟該員等弓馬生疎呈請酌辦臣現經覆加考驗都司馬聖佐弓馬實屬生疎惟年力尙爲壯健應請以守備干總降補勒限學習以觀後効守備邵剛不但弓馬平常人亦庸懦無能卽請勒休又把總鐵祥拓肇元張思茂劉詩四員或年力已衰或技

藝生疎均請革職以肅營伍至於口外蒙番均屬
安靜河北亦無野番偷渡惟今歲番地被旱水草
甚形荒涸現屆冬令冰橋將次結凍防範尤應嚴
密臣已與西寧辦事大臣穆蘭岱面爲籌議另摺
會

奏臣閱伍事畢卽行起程已於十月十一日回抵省
城謹

奏

道光四年十一月初二日奉

上諭那彥成奏校閱營伍情形一摺甘肅西寧鎮標後

營都司馬聖佐弓馬生疎惟年力尙健著以守備千
總降補中營守備邵剛弓馬平常人亦庸懦著卽勒
令休致把總鐵祥拓肇元張思茂劉詩或年力已衰
或技藝生疎俱著革職該部知道

調劑營伍

道光四年三月十二日

奏爲肅州巴里坤兩鎮應減裁兵馬匹懇請免照兵數統裁俾足差操事竊照道光五年正月前督

臣

長齡以陝甘兩省綠營馬匹較之各省多至數倍請酌減十分之一計裁馬兵三千六百三十名以步兵改補每歲可節省銀一萬餘兩裁馬三千六百三十匹可節省銀五萬餘兩二共節省銀七萬餘兩奏蒙

諭旨允准飭遵辦理在案嗣據藩司呈准肅州鎮咨稱

所屬安西沙州靖逆三營原額馬兵一千六百二十六名今裁馬改步一百六十四名原應裁馬一百六十四匹惟各營原設馬內向有摘缺緩補馬五百二十一匹實止存馬一千一百五匹是缺馬之數已與現在應裁之數較多若再照內地各營馬隨兵裁實不敷騎操茲請於三營實存馬內酌裁六十一匹又崔巴里坤鎮咨稱所屬各營原額馬兵二千九十三名今裁馬改步二百九名原應裁馬二百九匹因各營有摘缺緩補馬四百七十九匹止存馬一千六百一十四匹本不足馬兵之

數殊難與實額營分一體隨兵裁減請在實存馬
內酌裁七十九匹等情臣查明屬實當卽據詳咨
部旋准部覆以與原奏不符如果各該營額設馬
匹實難統裁應酌量情形據實奏明辦理臣復查
此案原裁馬數前督臣長齡本係就陝甘二省額
數統計今肅州鎮屬之安沙靖三營及巴里坤一
鎮原設馬內旣向有摘缺緩補不足一兵一馬之
額若再照兵裁馬誠不免短缺過多且安沙靖設
處嘉峪關外巴里坤尤係新疆要衝巡緝差操均
關緊要各營馬匹似宜充足茲復據藩司轉准該

鎮等呈請核

奏前來合無仰懇

天恩俯如所請准於安沙靖三營裁馬六十一匹巴里
坤各營裁馬七十九匹雖較之所裁兵數原有不
敷以各營摘缺計之尙屬有盈無絀而於營伍操
防仍無掣肘再口外例支糧料草乾與內地各營
科則額數較多前原奏內按內地約計肅州鎮屬
應節省銀三千二百八十兩今實按口外額支日
計酌裁馬六十一匹連裁馬改步可節省銀三千
四百一十兩零巴里坤鎮屬原計節省銀四千一

百八十兩今酌裁馬七十九匹連裁馬改步可節省銀四千二百三十餘兩與原奏節省銀數仍屬有多無少謹

奏

道光四年三月二十八日奉

上諭陝甘兩省綠營馬兵前經奏准酌減十分之一茲據那彥成查明肅州鎮屬之安西沙州靖逆三營及巴里坤鎮屬原設馬內向有摘缺緩補不足一兵一馬之額若照兵裁馬於各該營巡緝差操實屬不敷應用請免照兵數統裁等語著照所請准其於安西

沙州靖逆三營裁馬六十一匹巴里坤各營裁馬七十九匹所有各該營實存馬匹該督務隨時點驗毋許稍有短缺俾資操防

斷定蒙古地界

道光三年二月十二日

奏爲遵派道員會勘蒙古爭界與山西道員意見不同請

旨欽派大員復勘以息訟端恭摺具奏事竊查道光元年五月接准理藩院咨以河東杭錦貝子端多布色楞與河西阿拉善王瑪哈巴拉爭執地界一案先經飭交寧夏神木兩部員勘辦該部員等意見不合應令陝甘總督山西巡撫專派寧夏歸綏二道會同部員秉公復勘報院核辦當經陞任督

臣

長齡遵派孟夏道宜清安會同山西歸綏道復勘
去後茲據該道宜清安稟稱遵於道光元年十月
十四日會同山西歸綏道岳祥及該部郎副盟長
等帶同兩旗人證前往查勘河形核對卷宗圖說
該處黃河一道自南而北河東爲杭錦之地河西
爲阿拉善之地該兩旗檔案載有雍正十一年及
乾隆五年欽奉

諭旨俱以黃河爲界歷久遵守並無異議近年以來黃河
西岸哈爾和泥土等處地漸成熟杭錦旗因乾隆
五年部存七旗總圖黃河中流有庫克諾爾一處

嗣乾隆四十四年黃河改流東徙遂不以現在流水河身爲界欲以河流故道爲界並指故道口門係在上游中有諾爾諾爾卽澁港其成熟地土俱在諾爾以東係該旗之業詢之阿拉善旗則稱故道口門係在下游另有庫克諾爾爲故道中流並非杭錦旗所指之處其成熟地土七百餘頃在故道諾爾之西於乾隆三十年後陸續租與民人墾種至嘉慶十三年奉部飭查嗣經前任陝甘總督先福奏明每年准收地租四千餘兩作爲格格隨嫁包衣及貧窮蒙古養贍奉

旨准行與杭錦旗毫無干涉等語職道等逐一履勘據杭
錦旗所指黃河故道口門詢據土人僉稱地名察
漢豁賴與阿拉善旗所指故道口門之策根莫林
相距五十餘里細勘察漢豁賴地勢祇有乾溝一
道寬四五丈長二十餘里間栽紅柳沙包餘俱一
片平地並無黃河大溜形蹟西北百餘里始有諾
爾一處地名庫克諾爾與察漢豁賴溝形相距甚
遠並不聯屬查係阿拉善與烏喇特交界之地再
勘阿拉善旗所指之策根莫林地方黃河故道口
門約寬自十餘丈至六七十丈中流穿過諾爾一

處亦名庫克諾爾旁有廟宇綿長三百數十里仍有細流歸入黃河大溜核與部發七旗總圖內所繪河形相符詢據土人僉稱實係黃河故道據此而論則杭錦所指之察漢豁賴並非黃河故道似無疑義卽察漢豁賴西北之庫克諾爾檢查乾隆三十四年檔案因烏喇特與阿拉善控爭地界經欽派大臣富德勘定以庫克諾爾南岸作爲烏喇特牧界原奏內並未提及黃河中流亦無杭錦交界一語若如杭錦所指作爲黃河中流不獨阿拉善未肯甘心且侵佔烏喇特牧界勢必又啟爭端至兩造

所指諾爾旁之廟宇以爲台吉拉布坦廟者阿拉善以爲梅楞素諾木廟阿拉善以爲台吉拉布坦廟者杭錦又以爲干珠爾廟旣無匾額又無碑碣任人指名均不足據復據杭錦旗聲稱該處旣係阿拉善之地何以有杭錦旗之人在彼游牧詢之阿拉善則稱先年兩旗和好曾將河套地土租與杭錦旗游牧每年租羊三百隻後因無力改給租茶三百塊均有來往印文可憑歷係管事人等按年交租嘉慶二十三年涉訟後始不交納等語質之杭錦一味支吾堅不輸服查哈爾和泥土等處

若非阿拉善之地杭錦旗何肯向其出租游牧且
黃河改流已四十餘年阿拉善旗招懇取租亦已
五十餘年何以至今始行呈控自係覬覦該處地
土耕種成熟而兩處諾爾適值同名遂欲藉端影
射指黃河故道爲界希圖侵佔伏思該兩旗地方
節經奉有

諭旨以黃河爲界黃河東徙西徙非由人力應各安時命
總以流水之河身爲據不應牽涉故道致滋爭訟
無如杭錦旗堅執不從而山西歸綏道岳祥亦未
肯和衷商定聲言各自咨報事關外藩爭控地界

何敢稍爲附和謹將勘訊情形繪圖貼說稟請核
咨等情前來臣正在商咨山西巡撫間接准理藩
院咨稱此案業據歸綏道神木部員徑行咨部該
寧夏道等如何勘斷催令迅速報院適該道宜清
安因公來渥臣面加詢問復據該道口稱阿拉善
與杭錦兩旗以黃河爲界

聖訓煌煌昭垂萬古杭錦旗卽不應以河流改道妄啟訟
端且卽以黃河改道而論亦不應影射庫克諾爾
之名將阿拉善與烏喇特交界地方妄思侵佔且
烏喇特以庫克諾爾南岸爲界其諾爾以北俱係

烏喇特牧地若如杭錦所指諾爾爲黃河中流則
黃河自南而北岸列東西旣不得有南岸且斷無
將黃河中流給烏喇特游牧之理況乾隆三十年
間阿拉善卽將河全哈爾和泥土等處租給民人
耕種彼時杭錦旗曾以河西有伊屬下租住恐被
民人騷擾咨行阿拉善旗囑其驅逐若本係杭錦
河東之地豈容阿拉善越河招墾卽有民人私墾
亦儘可自行辦理又何必假手鄰封反復詳核杭
錦旗實屬情虧理絀現在歸綏道岳祥聽杭錦一
面之詞以致意見不合兩議詳報等語

臣 檢查前

後卷宗該道所稟均屬確有案據其以現流水之黃河爲界亦屬欽遵

聖諭爲兩造永杜爭端惟臣與阿拉善王瑪哈巴拉之兄

汪沁班巴爾係屬兒女姻親雖不在例應迴避之

列然徑由臣酌斷終不足以折服杭錦之心案關

外藩爭控牧界若稍有偏倚致令伊等私有爭競

殊不成事爲此繪該道原勘地圖貼具圖說恭呈

御覽並請

欽派理藩院大臣親詣勘辦以昭公允而息訟源如蒙

俞允臣一面飭知寧夏道宜清安將全案卷宗帶赴該

處聽候查詢謹

奏

道光三年三月初一日軍機大臣字寄奉

上諭那彥成奏道員會勘蒙古爭界意見不同請欽派
大員復勘一摺此案河東杭錦旗貝子端多布色楞
與河西阿拉善王瑪哈巴拉爭執地界經寧夏歸綏
二道復勘歸綏道岳祥聽杭錦旗一面之詞以致意
見不合兩議詳報經該督查明兩旗檔案載雍正十
一年及乾隆五年欽奉

諭旨俱以黃河爲界黃河東徙西徙非由人力應以流水

河身爲據杭錦旗不應以河流故道妄啟爭端卽以
黃河故道而論亦不應影射庫克諾爾之名將阿拉
善與烏喇特交界地方妄思侵佔案關外藩爭控收
界自不容稍有偏畸致滋爭訟那彥成於此案著毋
庸迴避現已有旨諭知卹樹棠飭該道岳祥迅速前
往甘肅仍會同寧夏道宜清安復勘那彥成俟該道
會勘後卽提同兩旗人證及該部郎副盟長等秉公
酌斷折服杭錦旗之心以息訟源而昭公允

道光三年五月二十五日

奏爲兩旗蒙古爭控地界遵

旨調齊人證卷宗查訊明確秉公斷結恭摺奏

聞事竊照杭錦旗爭控阿拉善旗地界一案欽奉

諭旨令臣毋庸迴避仍秉公酌斷欽此當經臣以兩道

前次履勘意見既不相同附摺

奏明於校閱寧夏營伍之便親身出口督率查辦茲
於五月十四日行抵察漢豁賴地方據歸綏道岳
祥寧夏道宜清安稟稱該道等遵卽會同神木部
郎札勒杭阿寧夏部郎德英額及正盟長貝勒索
諾木拉卜載根棟副盟長貝子雍隆多爾濟帶同
杭錦旗貝子端多布色楞阿拉善旗親王瑪哈巴

拉等復行周歷查勘該兩旗所指黃河故道形蹟
均有疑似之處據稟稱奉委查勘未能定斷致經
奏辦實爲惶懼等語臣當卽調齊全案卷宗連日督
同署西寧道屠之申蘭州府知府桂明詳加核閱
緣杭錦阿拉善兩旗牧地向以黃河爲界河東爲
杭錦之地河西爲阿拉善之地哈爾和泥土等處
地方係在河西先經先福

奏明准阿拉善開溝引水墾種收租而杭錦於早年
曾向阿拉善租種此地有該旗蒙古在彼游牧因
亦向種地民人收取水草水口銀兩已歷十有餘

年嗣因民人拖欠銀兩杭錦旗遂堵築水口不令灌溉地畝阿拉善向其爭論杭錦旗卽以此地雖在現今流水黃河之西而實在故道以東應以故道爲界係該旗之地因嘉慶十年該旗與達拉忒爭界案內有黃河乾隆四十四年改流之語並因河東七旗總圖內黃河中流繪有諾爾遂於現在流水黃河上游之察漢豁賴指爲改流口門復於西北百餘里指出諾爾一處作爲故道中流之據經該道等率同部郎盟長等查勘草地諾爾不止一處所指口門寬止數丈所指河槽中有沙包兼

有民人墾種地畝毫無流水行跡斷非黃河故道而阿拉善亦於下游五十餘里之策根莫林地方指出故道一處作爲此地仍在河西之據查驗口門較爲寬展河槽亦有細流惟中無諾爾形跡核與七旗總圖不符亦非黃河故道臣由石嘴子出口沿河行走數百里留心查看其中間有草廠及開種熟地餘皆一片沙漠黃流湍激或合或分支全甚多逐全均可指爲故道且乾隆四十四年黃河改流之說並無報官案據該兩旗人等亦俱不知改流之處迨結訟後始各尋故道作爲爭地界

址影射牽連均不足爲據該兩旗本因哈爾和泥土等處地漸成熟致相爭競現今查明黃河故道旣不足據自應卽就所爭之地秉公酌斷以杜訟端查哈爾和泥土與則卜蓋等處地土相聯本在河西早年杭錦旗曾向阿拉善租爲游牧每歲出租羊三百隻嗣因貧窮無力節次懇讓陸續減爲租茶三百塊已歷百有餘年均有來往印文可憑今據杭錦旗聲稱出茶所租之地係在阿拉善山及杭山等處相離黃河甚遠及阿拉善呈出乾隆三十等年杭錦旗給與地印文內有河灘河岔字

樣並載明哈爾和泥土等地名當場給與杭錦旗
閱看據稱因阿拉善山杭山等處現有伊等旗下
蒙古在彼游牧交納茶租卽是此地因卽據以呈
報伊等年幼實不知乾隆三十等年租地印文內
載有地名無可再辯是哈爾和泥土等處爲阿拉
善之地杭錦旗租住游牧毫無疑義乃次日杭錦
旗復用印文聲稱哈爾和泥土之地卽與杭山等
處相連旋又稱哈爾和泥土另在一處詰其現在
何處此時開種之哈爾和泥土又係何名則又不
能指出總以伊所指黃河故道並非虛捏以故道

爲界此地實係該旗之業復詰以黃流經過之處
應有沙淤何以所指故道河槽種有熟地據稱係
民人取土填平耕種又詰以河槽內均係深沙何
能種地與其遠處取土填平河槽方可開種何不
卽於取土之處耕種大省工本且所取之土今在
何處亦可勘驗該貝子無詞可對惟以地係我的
一語堅執不移人甚糊塗連日閒講萬難以理喻
查阿拉善旗於乾隆二十六年卽招民墾種地畝
至嘉慶二十年前任陝甘總督先福

奏准已開地七百三十五頃每歲收租銀四千餘兩

作爲格格隨嫁包衣及貧窮蒙古養贍嗣因舊開地畝間有水冲沙壓種地民人於哈爾和泥土及則卜蓋等處擇可耕之處墾種以補原額並開挖烏蘭溝引水灌溉杭錦旗因有屬下蒙古在彼游牧向民人收取水草水口銀兩後因節年拖欠先則堵築水口繼則妄指黃河故道爲界圖爭哈爾和泥土等處成熟之地而所指地方屢易其名並無一定處所加以駁詰理屈詞窮則仍稱地係我的不肯輸服查阿拉善開墾地畝已五十餘年黃河改流亦四十餘年卽杭錦收取水草水口銀兩

又已十有餘年今忽因民人欠交水草等項銀兩
遂啟爭端其爲覬覦成熟地畝已屬顯然查蒙古
地方招民開墾有干例禁斷不能將成熟之地舍
糊斷結致啟杭錦影射多開之漸而該旗每年出
茶三百塊租種此地已百數十年亦斷不能任阿
拉善種地民人日漸滋蔓礙其游牧該道等上年
會同勘斷之時副盟長處令以則卜蓋地方爲界
寫信央懇未能議結茲查則卜蓋以南之地業經
阿拉善開墾成熟未便斷給杭錦旗致違定例而
則卜蓋以北之地係屬杭錦牧廠亦未便聽阿拉

善再行開墾致無限制自應仍照上年該盟長所
議卽以則卜蓋爲界均各照舊管業所有烏蘭溝
之水本因澆地開挖應仍聽阿拉善引水灌溉其
種地民人水草水口銀兩亦准杭錦旗照舊收取
均不得再有阻撓茲訟其杭錦旗每年應出阿拉
善租地之茶亦應按年照數付給經臣移詢正副
盟長均出具印文呈稱如此酌斷兩有裨益實爲
公允阿拉善親王瑪哈巴拉俯首聽斷不敢稍有
爭執而杭錦旗貝子端多布色楞無詞可辯堅不
遵依該貝子係由族內近支揆舉之人本非嫡派

甚屬囂鄙糊塗其協理台吉人等利其興訟科派
烏拉以肥私橐該貝子旁支承襲不諳旗務輕聽
台吉人等慫恿妄指毫無證據之黃河故道結訟
不休拖累屬下蒙古應請

旨交部嚴加議處並飭行正副盟長將唆訟科派之台
吉人等嚴查明確按律責革懲辦以儆健訟而杜
爭端阿拉善旗親王瑪哈巴拉於額雅開種地畝
之外逐漸多墾亦未便任其藉稱原地有水衝沙
壓種地民人多墾補額稍爲寬貸亦應請交部議
處並飭寧夏部郎詳細查明所墾頃畝造冊報部

以示限制正盟長貝勒索諾木拉卜載根棟副盟
長雍隆多爾濟有管旗之責於此等爭界之案一
任頻年結訟不能早爲處結應請一併交部議處
神木部郎札勒杭阿前任寧夏部郎松瑞歸綏道
岳祥寧夏道宜清安查勘黃河故道因兩旗各執
一詞據實分詳請

奏尙無不合應與甫經到任之寧夏部郎德英額均
請免議謹

奏

道光三年六月初八日奉

上諭那彥成奏勘明兩旗蒙古爭控地界一摺前因杭
錦旗與阿拉善控爭地界交那彥成秉公查勘酌斷
茲據該督親往查明兩旗牧地向以黃河爲界河東
爲杭錦旗地河西爲阿拉善旗地內有哈爾和泥土
與則卜蓋等處地土相聯本在河西向經杭錦旗租
住游牧乃因民人欠交水草等銀遂啟爭端其爲杭
錦旗覲覲成熟地畝自無疑義著照所議所有則卜
蓋以南之地仍著阿拉善管理其則卜蓋以北之地
係屬杭錦牧廠毋許阿拉善再行開墾卽以則卜蓋
爲界均各照舊管業其杭錦旗貝子端多布色楞輕

聽台吉人等懇懇妄行指控拖累屬下蒙古著交部
嚴加議處並飭該正副盟長將唆訟科派之台吉人
等按律責革懲辦阿拉善旗親王瑪哈巴拉於額准
開墾地畝外任聽民人多墾亦著交部議處所墾地
畝卽飭造冊報部以示限制正盟長貝勒索諾木拉
卜載根棟副盟長貝子雍隆多爾濟於此等爭訟之
案不能早爲處結著一併交部議處餘著照所議完
結

那文毅公三任陝甘總督奏議卷五十九